



# Lidasip Lo mas kamap Somare toktok gen long kamapim strongpela lo long

## bosim ol lida

Kumalau Tawali i raitim

Lidasip Lo i kamapim bikpela politikal pait long Palamen long las yia. Nau i luk olsem bai dispela bikpela politikal pait i kamap gen.

Mista Somare i toktok Lo taim em i stap long long kirapim gen Lidasip Australia long wik i go i go long pes 2.



Photo i soim Aba i autim tiket bilong Rosen. Aba i pinisim Rosen long raun namba sikis. Tupela i pait long Panguna long Sarere 21, Me. Rosen i karim kiau na go bek long Fiji. Aba i redi nau long traim kisim Wol Feta Wait Sampiansip (World Featherweight Championship) long Moresby.

Poto — Bougainville Nius.



Poto — Mista Kanawi Pokichong, ples bilong en Mok viles long Manus Provins, i tok: "Mi save wari long ol Minista. Ol i no save helpim ranim kantri bilong yumi. Ol i save helpim ol tasol.

"Mipela i sindaun long ples i save wari tru long ol dispela. Olsem wanem mipela ken helpim kantri go het gut? Na sapos yu ting yu bikman o yu minista, na yu no ken helpim ol pipel. Em i samting nogut tru."

"Na nau mi amamas long Mista Somare i wokim nupela lo bilong ol lida."



### Lidasip Lo Kirap Gen.

Toktok bilong Lidasip Lo i kirap gen. Mista Michael Somare, Praim Minista i kirapim. Mista Somare i tok em i kirapim tingting ya bikos em i laik bai yumi i gat ol komyuniti we ol pipel i no pret na i no gat giaman nabaut.

Tasol anting tingting ya i kirapim gen planti wari. Na sampela pipel bai i pret liklik. Tasol ol lain i wari tru long gutpela ron bilong kantri bilong yumi bai i kirap na singsing. Bilong wanem? As bilong dispela lidasip lo em bilong helpim ol lida na gavman long ronim kantri long gutpela na stretpela tingting tasol. Ol lida i no ken giaman na mekim pasin nogut taim ol i lidim ol pipel bilong yumi.

Sapos Michael Somare i strong na ol memba bilong Palamen i orait long Lidasip Lo, sampela pipel i ting, bai em i wokim wanpela nambawan samting tru. Tasol sampela pipel i tok Lo i no olsem wanpela marila bilong stretim kantri wan tu.

I tru. Lidasip Lo em i lo tasol. I tru lidasip lo i no inap long mekim ol lida i lusim ol pasin kranki kwik taim.

Tasol kantri bilong yumi i olsem wanpela kanu. Yumi mas i gat stia. Olsem ol tumbuna bilong yumi i stiaim kanu bilong ol long ol sta na tait ating tu Lidasip Lo i inap stiaim tingting bilong ol lida bilong yumi.

Tasol ating tingting ya i kirapim gen planti tingting tasol. Ol lida i no ken giaman na mekim pasin nogut taim ol i lidim ol pipel bilong yumi.

Tasol sampela pipel i tok Lo i no olsem wanpela marila bilong stretim kantri wan tu.

## Lidasip Lo

i kam long pes 1.  
pinis. Mista Somare i tok yumi mas wok long kirapim komyuniti we i no gat pasin giaman na we ol pipel i no gat pret. Praim Minista i tok gen long kirapim dispela Lidasip Lo bikos i luk olsem ol samting i no ron stret taim PNG i kirap na ronim wok bilong lukautim mani bilong em yet.

### Pangu i orait.

Mista Somare i tok pati bilong em Pangu, i laikim tru dispela lo. Tasol poroman pati bilong gavman, Pipels Progres Pati, i no laikim dispela lo. Long dispela tasol Pangu na P.P.P. i bruk.

Tasol sampela memba na sampela bikman bilong gavman i no bilip bai ol Palamen memba inap tok orait long dispela lo. Bilong wanem ol i ting planti pipel insait long PNG i no laikim dispela lo.

Sampela arapela man tu

i ting Lidasip Lo i no inap kamap lo bikos i gat sampela arapela lain pipel i save yusim ol politisen bilong yumi long daunim dispela lo.

Lidasip Lo i olsem guria. Sapos i kamap lo bai i wok long brukim tru ol sampela kranki pasin i stap nau long gavman.

### Pater Momis i tok.

Minista bilong Desentralisesen, Pater John Momis, I tok ol lida i kranki. Ol yet i gat ka, ol yet i gat gutpela pe long fotnait, planti i gat bikpela bisnis. Sapos Lidasip Lo i tok long ol lida long pinisim ol bisnis bilong ol na kain kain pasin nogut insait long gavman, yu ting bai ol inap laikim dispela lo?

### Okuk bekim.

Mista Iambakey Okuk, lida bilong Oposisen, i tok olsem sapos Mista Somare i laik kirapim gen Lidasip Lo bai em i no laik.

Mista Okuk i tok, i gutpela sapos ol lida i tokaut long ol bisnis bilong ol na olgeta samting ol i papa bilong en. Em i tok, bai em inap tokaut long ol bisnis bilong em.

Tasol em i tok: "Mista Somare i tok pinis, bai em i katim pe bilong en inap long K1,000 long wan yia. Tasol em i katim pe? Nogat.

### Tok i no stret.

Somare gen, i tok bai em i kisim narapela kain ka, olsem liklik ka. Tasol em i salim bikpela ka? Nogat.

Somare i tok, bai em i no inap stap insait long wanpela bikpela haus tru. Tasol em i lusim bikpela haus? Nogat.

"Na em i tok, sapos Palamen i no yesa long Lidasip Lo, bai em i pinis long Praim Minista. Tasol em i pinis? Nogat.

"Olsem mi nogat bilip long dispela Lidasip Lo. Nogat tru."

## Rural Helt Senta

Lilly Langtry i raitim

Minista bilong Helt, Mista Raphael Doa i tok, em i no stret long ol et pos bilong Misin na ol narapela helt senta i sasim ol pipel long givim mani long kisim marasin, sut o pasin sua.

Long taim Mista Doa i go mekim lukluk raun long ol Niugini Ailan, em i lukim ol helt senta bilong Misin na ol helt senta em Provinsal Gavman i save lukautim i sasim ol man long pe pastaim, na bihain kisim marasin.

Em i tru olsem ol haus sik i save sasim ol pipel long kisim marasin tasol Nesenel Gavman i no orait long ol liklik helt senta long sasim ol pipel. Nogat. Gavman i orait long ol bikpela haus sik tasol i ken sasim ol pipel long peim mani pastaim, na bihain kisim marasin.

### Lo i stap.

Helt Dipatmen i gat lo olsem, ol bikpela haus sik tasol long PNG i mas sasim ol pipel long 50 toea long kisim marasin, kisim sut o pasim sua. Tasol taim ol dokta i katim ol sikman, sas o pe bilong dispela i antap liklik, na tu ol sikman yet i mas peim K4.00 gen antap long dispela sas haus sik i givim pinis long en.

I gat planti we tru long helpim ol yet, tasol em i no gutpela long ol

helt senta i sasim ol pipel long peim mani long kisim marasin, kisim sut o pasim sua.

Mista Doa i tok tu olsem, em i gutpela sapos ol komuniti grup i givim helpim long mani, wok wantaim na kirapim ol helt senta long eria bilong ol yet. Olsem tasol bai olgeta wok i ran gut tasol.

### K33 Milien.

Wanpela tokman bilong ol sios i tok, long yia 1978, Helt Dipatmen i bin kisim teti tri milien kina (K33,000,000) olgeta. Tasol Gavman i bin givim 2.6 milien kina tasol long Misin.

Dispela mani Gavman i givim long ol Misin, hap i save go long peim ol wokman bilong sios. Ol sios yet i gat faiv handet (500) wokman olgeta, na namel

long ol, foa handet i nes na wan handet ol i et pos odali tasol.

Tokman bilong ol sios i tok tu olsem, long mun Epril i go inap long Jun long yia 1978, Lokal gavman i givim wan handet na nain tausen tri handet kina (K109,392) olgeta i go long ol helt senta.



### National weekly in Melanesian Pidgin

Editorial:  
P.O. Box 1982  
Boroko  
Phone: 25 2500  
Telex: NE 22213

Advertising:  
In Australia  
Media Sales Australia  
Sydney  
Phone: 436 1000  
Telex: AA 23211

Advertising:  
In P.N.G.  
Georgina Gaiger  
Phone: 25 2500

Subscription Rate:  
Annual: K8.00

# Yuni Studen Bekim

Ben Skorpio i raltim.

Planti sumatin bilong Yunivesiti long Papua Niugini long Moresby, na ol narapela koles i no moa go long skul. Em long wanem, ol i no amamas long Gavman i givim K10.00 long ol long olgeta wan wan fotnait. Na tu long wanem dispela mani Gavman i givim long ol i no save helpim ol tumas long baim olkain samting olsem pen bilong rait, na sop bilong wasim ol klos, na nupela klos bilong putim long skul.

Ol sumatin i laikim bai Gavman i apim pe ol i save givim long olgeta wan wan fotnait.

Long wik i go pinis, wanpela ripota bilong Wantok i bin go long Yunivesiti na kisim sampe-la toktok na tingting bilong ol sumatin long dispela K10.00 ol i save kisim long en. Ol studen i save mekim wanem samting tru long dispela liklik mani Gavman i save givim long en.

Sampela sumatin i givim stori na tok, ol i gat wan-

pela bikpela wari long dispela K10.00. Ol i tok long dispela K10.00, ol inap long baim ol liklik samting olsem marasin bilong wasim titi, pen bilong rait na sop bilong wasim ol klos tasol. Tasol ol i tok, ol i no inap tru long baim nupela trausis na siot, na ol narapela samting i kostim moa long K10.00.

**Stori bilong Nikolaus.**

Em hia stori bilong Nicholas Jilawara, em :

wanpela Seken Yia Studen bilong Saiens long Yunivesiti. Nicholas i tok, em i save kisim K10.00 long olgeta wan wan fotnait olsem ol narapela sumatin. Nicholas i tok tu olsem, taim em i kisim dispela mani, em i no save baim nupela klos, long wanem ol klos olsem trausis na siot i kostim moa long K10.00.

Nicholas i tok tu olsem, em i save sevim K5.00 tasol long beng, tasol narapela K5.00 em i save skelim long baim ol narapela liklik samting em i gat laik long baim. Na tu em i tok, dispela K5.00 em i putim long beng em i save bungim i stap tasol. Na taim mani bilong em i go bikpela liklik, em i save yusim long baim trausis na narapela samting i kostim moa long K10.00. Tasol Nicholas i tok, dispela K5.00 em i save sevim long beng i no save stap longpela taim. Em long wanem, long taim em i save kisim mani long Fraide, em i save yusim olgeta mani long wiken, olsem na em i save go gen long beng na rausim K5.00. Em bikos em i nogat mani tru long baim ol samting em i gat laik long en.

**Stori bilong Benny.**

Em hia stori bilong narapela studen, na sumatin ya em Benny Takin. Benny em i wanpela Fes Yia Studen bilong Lo long

Yunivesiti. Benny i tok, dispela mani K10.00 Gavman i givim long ol i no inap long helpim em. Em i no inap long baim klos long ol stua.

Tasol Benny i tok, dispela mani i liklik tru, olsem na mani i save pinis long wan wik tasol. Na narapela wik em i save sindaun nating tasol. Benny i tok, Gavman i mas painim we long pinisim dispela tingting o wari bilong mipela studen pastaim, na bihain orait ol i ken toktok long pinisim skul olgeta.

Benny i tok tu olsem, taim em i save go raun long taun, planti wantok i save tokim em olsem? Yu wanpela sumatin bilong Yunivesiti o man i nogat wok. Benny i save wari long ol dispela toktok,

tasol bai em i kisim mani we. Taim Benny i save kisim K10.00 long fotnait, em i save go na baim stret ol samting em i mas i gat long rum slip bilong em. Olkain samting olsem kopi, em bilong dring long nait long taim bilong stadi.

**Bikpela mani i lus.**

Em hia namba bilong mani gavman i save lusim long baim skul bilong wanpela sumatin long wan yia. Gavman i save skelim K4,000 (foa tausen) long wan wan studen long yunivesiti.

Na long Medikal Skul ol i save katim K11,000 kina. Long Yunivesiti long Lae K6,000 na long Goroka Tisa Koles K3,000. Na tu i gat sampela moa mani gavman i lusim long baim kaikai bilong ol studen.




Photo - Nicholas Jilawara.



Poto - Benny Takin.

## NIUS - NIUS - NIUS - NIUS - NIUS - NIUS - NIUS

● **RANAWE MAN** - Wanpela ranawe man bilong Wes Irian, Yan Nusi bilong Wonti viles long Serui Distrik i kalapim mak bilong boda na kam insait long P.N.G. Plis pasim em na kot i givim 3 mun kalabus long em. Man hia i gat 29 krismas pinis.

● **STUDEN STRAIK** - Namba tu Praim Minista, Mista Ebia Olewale i tok as tru bilong ol studen i straik em ol sampela man bilong politik i egens long gavman na i skrapim bel bilong ol studen. Em i tok gen, ol studen i gat wanpela wok tasol, em i long go long skul na stadi. Ol i mas soim ol pipel na gavman ol i inap long mekim gutpela wok na helpim kantri go het. Ol i mas bekim long kantri long bikpela mani i lusim long baim skul bilong ol.

● **MISTA GAI DUWABANE** - Minista bilong Defens, i tok olsem neks yia, 1980, bai gavman i givim K3 milien olgeta long ol man husat i pait pinis wantaim ol Japan long taim bilong wo. Em i tok, ol lapun soldia insait long Australia i kros tru long gavman bilong Australia. Ol i laikim bai gavman i mas givim mani tu long ol lapun paitman bilong PNG.

**PE BILONG KAKAO - KOPI - KOPRA**

**KAKAO** - K1,709 long wan tan.

**KOPRA** - Prais olsem mun Epril.

**KOPI** - Y Gred K1.80 inap K1.85 long wan kilo  
X Gred K1.84 inap K1.90 long wan kilo  
A Gred K1.90 inap K1.95 long wan kilo  
Robusta K1.72 inap K1.85 wan kilo  
Pe bai yu kisim long ol wan wan taun  
Kainantu - K1.01 inap K1.08  
Goroka - K1.06 inap K1.15  
Kundiawa - nogat olgeta  
Minj/Banz - K1.21 inap K1.30  
Mount Hagen - K1.32 tasol  
Wewak - Robusta - K90 toea tasol  
Lae - Arabika - K1.10 tasol  
Robusta - K1.08 tasol  
Wapenamanda - 90 toea tasol  
Mumeng - Robusta - nogat olgeta  
Madang - Arabika - 90 toea tasol  
Robusta - 85 toea tasol



## Kukim Gut Kaikai.

Dia Edita - Hia nau plis mi i gat bikpela wari i bagarapim laip bilong mi. Wari bilong mi i go olsem. Mi wanpela wokman bilong Bougainville Kopa long Panguna. Na mi save slip long kem 10 na olgeta moning, belo na long apinun, mi save go kaikai long kem 10.

Tasol long olgeta fotnait ol i save katim K12- bilong baim kaikai bilong olgeta wokman. Mi kisim maus bilong mipela sampela wokman na salim wari long Wantok Nius.

Ol kukboi i kukim kaikai na givim mipela na taim mipela i kaikai, swit bilong ol abus i olsem dok, rebit, olsem mit bilong hos. Taim mipela i kaikai pinis na i go long bet, wanem samting i kamap? Bel i pen i no pilai pilai.

Moning kirap i go wok. Mi no wok gut mi wok long i go i kam long smol haus na pekpek wara i sut olsem wara na bodi i slek na les long wok.

Ol bos i save givim planti wok long mi na mi wok long baim gutpela kaikai long stua. Poket mani bilong mi i pinis. Na nau mi laik askim B.C.L. Union i mas lukluk i kam long ol wok boi bilong en. Ol i kaikai olsem wanem na slip olsem wanem.

Tenkyu. Em tasol wari bilong mi. Husat i laik sapotim, orait, rait tasol i go long Wantok Niuspepa.

Moses Yambalia,  
Panguna/N.S.P.

## Ol Haus Sik Wokman Les.

Dia Edita - Wanpela pasin mi save lukim long Esa'ala Haus Sik, i no stret

## Stori Tumbuna I Gat Mining.

Dia Edita - Inap long yu givim mi liklik spes long putim wari bilong mi long Wantok Niuspepa. Yes mi laik bekim tok bilong brata H. Lyfaner.

Yes brata yu tok man bai i no inap tanim olsem koki na koki i no inap tanim olsem man. Yes brata em tru, tasol long bipo long tumbuna taim em man inap tanim olsem koki, o man em ken kamap pis o snek.

Na brata yu tok man em i no inap kamap koki. Brata mi ken tokim yu stret, yu nau tasol yu skul na yu ting yu moa yet. Yu mas tingting gut long stori bilong tumbuna taim.

Em tru papa God i mekim yumi ol man na meri, em baibel i tok olsem, tasol long tumbuna taim em inap tanim olsem koki. Em tasol nau liklik brata, tingting gut na rait no ken rait nating, harim!

Sapos yu gat liklik wari, orait, rait tasol long Wantok Niuspepa na mi ken lukim.

Johnny Waco.  
Vanimo.

long ai bilong mi long wok bilong ol medikal.

Ating ol medikal hia long Esa'ala ol i no save wok gut. Ol i save westim taim long smok na kaikai buai na ol sik manmeri ol i save wet.

Na tu ol i no save pasim sua gut. Long dispela kain pasin mi ting i no stret, long wanem em wok bilong medikal na ol i mas wok gut. Pasim sua gut na sevim ol sik manmeri gut.

Bikpela wari bilong mi em long kamap long taim. Mi save lukim ol i no save wok long taim. Taim bilong tretmen em 8 klok na ol save westim 2 o 3 aua long redim ol instramen. Et klok i go inap 9 klok o 10 klok em i no taim bilong redim ol instramen!! Ol i mas redim long 2 o 3 bipo 4 klok.

Ating sapos ol wokim long dispela pasin em bai ol i no westim taim. Ol i mas redi long de bipo, long wanem ol i save redim instramen long 8 klok i go inap 10 klok na ol sik man meri save wet na wet. Mi harim dispela komplek, olsem, na mi laik ol tingting gut long dispela.

G. Kei,  
Esa'ala/Milne Bay.

## No Ken Raitim 'Sori Nogat Wok'.

Dia Edita - Mi i gat wanpela wari bilong mi olsem. Yumi i gat planti kampani, gavman dipatmen, bisnis man na meri insait long Papua Niugini.

Mi laik save tru, bilong wanem ol i save raitim "Sori Nogat Wok", "Sori Nogat Wok" nabaut nabaut long dua bilong ol? Bilong wanem, ples bilong en tasol o wanem as bilong en ol save raitim?

Yumi Papua Niugini i gat moa edukesen o save man na meri na nau bai mipela kisim wok. Mi i gat bikpela kros tru long dispela. Tasol i no mi wanpela, mi save, ol sampela pilim olsem mi tu.

Mi tok strong tru long dispela. Bihain yumi mas rausim ol dispela sain, "Sori Nogat Wok" nabaut. Em tasol hevi bilong mi. Na sapos husat man na meri i laik sapotim toktok bilong mi, yu ken plis. Em tasol, tenkyu tru.

Benny K. Marabe,  
Mt. Hagen.

## Helpim Spak Man.

Dia Edita - Mi gat liklik wari na yu ken putim i go insait long Wantok Nius? Wari bilong mi i go long ol plisman na ol kain pasin ol

i save mekim long ol spak man.

Ol man i save dring long taven na spak nogut tru. Na taven i klos long 8 o 9 klok na ol i bagarap tru long wokabaut i go long haus bilong ol. Na ol plisman ol i save woknait i save lukim ol dispela spak man. Ol i save askim em yu kam we? Na em tok mi spak ya. Na ol plis tok yu go stret long haus bilong yu.

Na taim ol i go, sampela birua i save kamap long dispela taim. Na kilim man i dai na dispela kain pasin bilong ol plisman i no stret. Sapos man i spak olsem, yu mas helpim na kisim em i go long haus bilong em. Na i no ken lukluk nating. Yupela i save longlong tru ol plisman.

Husat man i laik sapotim mi na husat plisman belhat rait tasol i go long Wantok Niuspepa na mi lukim. Em tasol. Tenkyu.

S. Sauta,  
Arawa.

Salim ol pas  
i kam long:  
WANTOK  
BOX 1982  
BOROKO

## Nes Mekim Wok

Dia Edita - Yu inap givim liklik spes long mi long bekim pas bilong wantok ya Moses Winka, Wantok 39 Mas, 1979.

Wantok, yu tok olsem ol nes save lusim trausis bilong ol man i go daun tambilo tru. Em tru em wok bilong mipela. Taim mipela skul long nes ol bin soim mipela olsem. Mipela laik givim sut na ol save sem sem moa yet, orait mipela lusim trausis bilong ol i go daun. I gat ples bilong givim sut long as. Nogut mipela givim sut long rong ples bai man ken lusim planti blut o dispela marasin em bai i no inap i go insait long mit, em bai i stap autsait long skin na em bai i no inap wok.

Mi wanpela Sista long Vanimo Haus Sik na mi raitim dispela pas long

makim ol nes na sista long dispela Haus sik. Yu gat kros orait yu rait i go tasol long Wantok na bai mi bekim moa long yu.

Sista P. Jacinta,  
Vanimo.

## Dokta Na Nes Save Helpim Planti

Dia Edita - Nau em i pes taim tru long mi rait pas i go long Wantok Niuspepa. Nau mi laik bekim pas bilong man ya Powi Puasepa Yawip bilong ples Sim Garaina, Morobe.

Em i bin tok olsem ol nes i save tok bilas long ol meri i gat sik gonoria na pasim rot bilong ol long go long haus sik long kisim sut na marasin.

Ating dispela man ya Pawi, ating em i man bilong giaman stret. Ol nes na dokta ol i no save tok bilas long husat manmeri i gat sik gonoria. Ol dokta na nes ol i save hepi tasol long painim ol man o meri i gat sik gonoria long givim sut na marasin long pinisim dispela kain sik olsem nau yu tok sik gonoria.

Mi wanpela nes i bekim dispela pas bilong yu na mi laik tokim yu stret olsem. Long lo bilong mipela ol nes na dokta em i tambu tru long tok bilas o tok baksait long ol sikman.

Tasol mipela ol nes i no save kisim sik gonoria. Nogat tru. Em sampela manmeri i save kisim sik gonoria na ol i no save go long haus sik long lukim ol dokta na nes.

Ol i save sem na hait tasol long ples o taun i stap na ol i no save go autim dispela sik bilong ol long ol nes na dokta.

Sapos ol i no sem na i no go hait nambaut long ples. Na sapos ol i go autim sik bilong ol long nes long haus sik, olaman, yu ting bai dokta na nes i kirap na tok bilas long yu.

Bai ol i amamas tasol na givim sut, marasin long yu long pinisim dispela kain sik nogut.

Em tasol liklik wari bilong mi. Sapos husat man i bel pen long toktok bilong mi, orait, rait tasol i go long Wantok Niuspepa.

Helen Sauna,  
Marienberg/Is Sepik

# Kibung Bilong ol Buka Fama

Long Mas 15 na 16, i bin i gat bikpela kibung namel long ol Fama, Gavman, ol Lida, Komuniti Gavman, Dipatmen bilong Edukesen, ol Haiskul, Vokesenel Skul, na ol man husat i gat laik long helpim Rural Developmen long Not Solomons Provins.

Dispela kain kibung i save kamap bihain long olgeta 3-pela yia, olsem na dispela kibung i kamap em i namba tu kibung bilong ol fama. Nambawan kibung i bin kamap long yia 1976. Long dispela nambawan kibung, ol i bin tok promis long mekim kamap eitin (18) wok o projek, tasol namel long ol fotin (14) projek i kamap gut.

Melanesian Kaunsil bilong ol Sios yet i bin tingim dispela aidia bilong wokim Kibung bilong ol Fama. Na ol grup ya Sen Patrik Egrikalsa Trening Skul na Not Solomons Kristen Fama Asosiesen i bin kirapim dispela kibung nambawan taim. Tupela grup ya i bin bung wantaim Dipatmen bilong Praimeri Indastri na Bougainville Kopa Kampani, na sampela ol bikman bilong Gavman i statim Stiaring Komiti. Nem bilong dispela kibung em Not Solomon Rural Impruvmen Semina bilong MCC.

## Gavman na Fama.

Kibung ya i olsem bikpela Konsaltesen o 'TOKTOK WANTAIM' ol Fama na Gavman, na olgeta deliget bilong ol grup o asosiesen na ol skul. Ol i save sindaun bung na skrapim toktok na aidia bilong ol wantaim ol bikman bilong as ples. Gavman i save amamas tru long

harim ol as tingting bilong ol. Long dispela we tasol, Gavman tu i soim rispek long ol pipel, kastam na kalsa bilong ol.

## Kristen Famili.

Dispela kibung i no bilong ol sios tasol. Nogat. Em i bilong olgeta pipel yet. Em i tru olsem Sen Patrik Skul Fama i go pas na kirapim wantaim Katolik Sios na Yunaitet Sios long yia 1976. Tasol long dispela kibung, ol fama bilong SDA Misin tu i bin kam long dispela taim, olsem na dispela i soim olsem yumi olgeta i mas bung olsem wanpela Kristen Famili tasol.

## Moa Fam.

Long dispela kibung, ol i bin skelim na glasim ol wari i save pasim developmen long ol rural eria. Na tu ol i bin lukluk na toktok long ol nupela aidia ol i laik putim kamap long en. Planti fama i laikim olsem bai i mas i gat moa

fam bilong sipsip, bikbel na pukpuk.

## Meri Fama.

Nambawan kibung i bin sapotim aidia bilong Primia long makim sampela meri long wok fama. Gavman tu i bin tok orait long ol meri i mas go skul long wok fama long Mabiri Fam. Long dispela tasol, ol i bin singautim sampela man i gat save long wok didiman long Dipatmen bilong Praimeri Indastri na skulim ol meri long wok fama.

## Wan Handet Fama Amamas.

Long taim kibung ya i pinis, i bin gat bikpela selebresen tru makim Bet de bilong Sen Patrik. Na tu long graduesen de bilong ol yangpela Kristen Fama bilong Mabiri Fama Skul. Mabiri skul i winim 10-pela yia pinis na namba bilong ol studen husat i graduet pinis long dispela skul i wan handet (100) olgeta.



*Poto antap — Wanpela sumatin meri bilong Sen Patriks Egrikalsa Skul i holim liklik pato.*

## PROVINS NIUS



*Poto daunbilo ol meri i wok long gaden kaukau. Ol meri i amamas moa long mekim wok didiman.*



*Poto antap — Ol meri i wok long wasim umben.*



# **EVINRUDE**

**NAMBAWAN AUTOBOT MOTO**

**6H.P 15H.P 25H.P 35H.P**


**PLANTI SPEA PAT I STAP**

**PRAIS I DAUNBILO NAU**

**BAIM TUDE LONG**

# **BOROKO MOTORS**

## **And Subdealers**



## **TAIM BILONG TRAIM PAPUA NEW GUINEA COFFEE**



# BIKPELA MUVI FILM SO

## "I KAMAPIM" BAI EM I KAMAP.

Long namba 10 de long mun Me, Port Moresby bai i putim kamap wanpela so long soim ol kain kain film o muing piksa long Yunivesiti bilong Papua Niugini. Nem bilong dispela so em "I KAMAPIM".

Bai i gat ol film bilong ol lain kantri ya Algeria, Cuba, Senegal, India, Bolivia, Amerika na Yurop.

Long dispela so, ol bai soim ol film i toktok long ol gutpela tingting long sindaun bilong ol pipel.

Meri i go pas long dispela so em Dokta Angela Gilliam. Dokta Gilliam em i wanpela blakskin meri bilong Amerika, tasol nau em i wanpela tisa bilong ol tok ples long Yunivesiti bilong PNG.

Dokta Gilliam i tok, ol i

## PES BILONG OL MERI



gat samting olsem twenti (20) film pinis, tasol em i ting bai i gat moa film i kamap yet. Planti bilong ol dispela film ol i soim long en, bai i toktok long tarangu manmeri i pait long fridom o gutpela sindaun bilong ol yet.

### Muvi bilong Russia


Bai ol i soim wanpela gutpela film bilong Russia ol i kolim 'Dersu Uzala'. Dispela film bai i toktok long wanpela man bilong painim olkain animel, i skulim wanpela soldia long we bilong sindaun insait long bikbus.

Em hia sampela ol film em bai ol i soim long dispela so long Yunivesiti. Film bilong Japan ol i kolim 'Minimata'. Dispela film bai i toktok long pasin bilong fektori i bagarapim sindaun bilong ol pipel long ol viles.

### Muvi bilong Bolivia

Film bilong Senegal ol i kolim 'Mandabi'. Film ya bai i toktok long Gavman i bagarapim sindaun bilong ol pipel long ol viles.

Film bilong Bolivia ol i



Poto i soim Angela Gilliam wanpela blakskin bilong Amerika i wok tisa long Yunivesiti. Poto — Jim Jicki, UPNG

kolim 'Blood of the Condor'. Dispela film bai i toktok, long ol kanaka meri bilong Saut Amerika i no laikim bai Gavman i pasim ol long karim moa

pikinini.

Long taim ol i soim film, bai i gat man i tanim tok i go long Tok Pisin na Hiri Motu. Long wanem, planti man i gat liklik save

long Tok Inglis.

Planti bilong ol dispela film bai ol i soim nating, na i no gat sas long en long Yunivesiti Open Ea Tieta.

Link take-up lever for perfect stitching.

Automatic bobbin winder.

Stitch length lever and reversing control.

Drop feed for darning and embroidery.

## PREN BILONG YU INAP OLTAIM

## KUKIM GUTPELA KAIKAI


KAIKAI YU INAP KUKIM INSAIT LONG KOKONAS SEL

Ol samting yu mas i gat:

1. Wanpela kokonas (susu bilong kokonas)
2. Wanpela tim mit (yu mas katim liklik)
3. Ol sayor
4. Sol
5. Kaukau (yu mas katim liklik) o banana

Em hia ol we long wokim:

Yu mas miksim mit wantaim sayor, kaukau, sol na susu bilong kokonas, na putim i go insait long hap sel bilong kokonas na karamapim wantaim narapeha sel bilong kokonas. Na bihain yu pasim long hap rop o string, na putim insait long wanpela sospen i gat wara na larim em i boil inap long 2-pela aua samting.



# LUKIM MANI KAMAP BIKPELA

- Long Pas Buk Bilong Yu
- Long Mani Yu Putim Long Beng

Mipela was gut long moni  
bilong yu

**Wales**



**Bank of New South Wales  
(PNG) Ltd.**

# Gras bai lait moa..Loxene



Taim yu laik wasim gras bilong yu, yu no ken Risim smel sop. Nogat. Kisim Loxene. Loxene i go. Sori. Gras bilong yu i smat moa, bai i lait tru. Yu ken wasim long hat o kol wara. Wasim gras bilong pikinini long Loxene bai isi tru long rausim laus. Taim yu laik baim sop wara bilong wasim gras baim Loxene tasol.

**YU KEN KISIM LONG OLGETA STUA NA TRETSTUA.**



# ANDREW YOUNG

## Kam Lukim PNG



*Poto hia i soim (long raithan tru) Mista Andrew Young, pesman bilong Amerika long Yunaitet Nesens. Long Me 1 em i kamap hia long lukim PNG. Em i sanap wantaim meri bilong Martin Luther King na Presiden bilong Amerika, Mista Jimmy Carter na lapun papa bilong Martin Luther King. Ol i wokim wanpela singsing ol i kolim "We Shall Overcome". Ol i wokim singsing long haus bilong presiden stret. Ol sampela wantok bilong ol i helpim ol long singsing.*

*Mista Andrew Young i kam lukim PNG long dispela wik tasol. Em i kam wantaim meri bilong em Misis Jean Young. Tupela bai i raun lukluk insait long PNG. Mista Young em i tokman bilong Amerika long Yunaitet Nesens na em i save*

*raun planti long ol kantri long Afrika na Esia long bringim tok bilong gavman bilong Amerika na harim tok bilong ol bikman bilong ol dispela kantri.*

*Bipo Amerika i nogat planti pren tumas long ol kantri long Afrika na Esia. Tasol Mista Young i raun planti na toktok wantaim ol bikman pinis na planti i wanbel gen wantaim Amerika.*

*Long trinde 2 Me, Mista na Misis Young i bin go long Goroka. Ol i bung wantaim Premier, Mista James Yanepa na Mista Young i bin lukluk long ol wok kopi bilong Isten Hailans. Misis Young i bin bung wantaim ol meri na toktok wantaim ol long wok bilong Yia bilong Pikinini.*

# Melanesian Brata

Wanpela lain brata bilong Pasifik stret i bung long Solomon Ailans long wik i go pinis. Dispela lain brata yumi kolim Melanesian Brata. Wanpeal plisman bilong Solomon Ailans i kirapim dispela lain brata long 52 yia i go pinis. Plisman hia em i memba bilong Engliken Sios na taim em i karim bikpela sik na klostu i laik indai, em i gat tingting long kirapim nupela lain brata bilong Pasifik stret.

Bihain liklik em i kirapim dispela lain Melanesian Brata. Dispela nupela lain brata i nogat wanpela waitman o misinari i memba long en. Nogat. Ol yet i wokim wok. Em i samting bilong Pasifik stret.

Ol dispela lain i save tok tru antap long stap brata long tripela yia. Long dispela taim ol i mekim wok bilong sios tasol. Ol i no inap marit, ol i no inap wok mani. Ol i kisim blakpela siot, na trausis na buk baibel tasol.

Dispela 3-pela yia i pinis ol inap go bek long ples na mekim wok bilong papa o marit. Laik bilong ol. Tasol sampela i mekim promis long 3-pela yia moa, na sapos ol i laik ol i ken skruim i go olsem inap long laik bilong ol. Sapele i stap 20 yia pinis na mekim wok bilong sios.

## Ol Yangpela.

Planti bilong ol brata i yangpela man tru. Na planti bilong ol i no skul tumas. Ol i go long bus tru, na ol i sindaun wantaim ol haiden na lainim tokples bilong ol, wokim gaden, na isi isi ol i save autim gutnius long ol.

Ol Melanesian Brata i wok insait long Fiji, Niu Hebrides, Solomon Ailans, Australia na PNG. Taim ol i laik kamap brata ol i mas traime wok inap long tupela yia olgeta. Sapos ol i smat long wok orait ol i ken mekim promis long 3-pela



*Poto antap i soim Brata Laurence Ambeke, bilong Oro provins i autim sampela tok-tok long miting. Brata Laurence bai i go wok misinari long Australia long narapela mun bihain.*

yia. Sapos nogat ol i mas go bek long ples.

Australia na long Torres Strait.

Tupela i kamap misinari tru na ol i go long ol blakman bilong Australia.


Tude i gat 90 brata i memba na i gat narapela 66 man i traime wok brata.

Long mun Me, bai brata Laurence, na Brata Sergius Paulus bilong Milne Bay Provins, bai i go wok wantaim ol blakman long

## LOTU,NIUS



*Poto i soim 4-pela hetman bilong ol Melanesian Brata. Kirap long lephan i go long raithan yu ken lukim Patterson bilong Solomon Ailans em wanpela namba tu bilong het brata. Na Patterson Ihorama, het brata, bilong Solomon Ailans. Na Michael Lolu, bilong Niu Hebrides em i het brata long PNG provins. Na John Oa, bilong Fiji em i het brata bilong Fiji na Nu Hebrides Provins. Ol i makim hetman long kibung bilong ol long Tabalia klostu long Honiara long wik i go pinis.*




*Poto antap i soim Asbisop Norman Palmer, bilong Engliken Sios bilong Solomon Ailans na Niu Hebrides i blesim brata Patterson bilong helpim em mekim bikpela wok hetman bilong ol brata.*



**bikpela lek**



lik lik lek



**KAYDEE lek!**

Kaydee sandal emi smatpela bilas bilong lek belong yu.  
baim long olgeta stua. Emi smat tru.

HAGEMEYER (PNG) PTY. LTD., PT. MORESBY, LAE, MT. HAGEN, WEWAK, MADANG, RABAU.

GSHK 36

# Nupela Kain Skul

Ol

Ben Skorpio i raitim.

## Is Nu Briten wokim nupela kain skul



Is Nu Briten Provinsel Gavman i wokim pinis wanpela plen o tingting long senisim sampela samting long Edukesen Sistem. Em long wanen, long las yia sampela ol pipel bilong Is Nu Briten i bin laik lukim sampela senis is kamap long Edukesen Dipatmen.

Plen bilong Is Nu Briten Provinsel Gavman i go olsem: Olgeta pikinini krisman bilong ol 5 0 6 yia pinis i mas go long skul.


1. Long prep skul, ol tisa i mas lainim ol pikinini long tok ples bilong Tolai yet.
2. Long komuniti skul, i mas i gat Standet wan i go inap long Standet 8 tasol. Dispela i min olsem ol pikinini i no inap long wokim Fom 1 na Fom 2 moa long haikul. Nogat. Em long wanem, ol i skul pinis long Fom wan na tu long komuniti skul yet.
3. Long haikul bai i mas i gat Fom 3 i go inap long Fom 6 tasol. Olsem tasol bai ol pikinini i ken i go skul long haikul o Nesenel Haikul tasol.

Ol pipel bilong Is Nu Briten i laik lukim sampela senis long wanem, ol i pilim pinis planti hevi i kamap long pikinini bilong ol yet. Ol kain kain hevi olsem long sindaun bilong ol pikinini long ol skul na tu long ples tu. Ol pikinini i no gat wok, na tu ol papamama yet nogat bisnis.

I bin i gat planti kros long graun, na tu i bin i gat dring na spak pasin i kamap long provins bilong ol. Ol pikinini i smat moa long go long skul, na tu ol tisa i no skulim gut ol pikinini bilong ol.

Dispela tingting bilong Infomel Edukesen i min olsem, olgeta kain skul ol pipel i save kisim ausait

JACOB TIMELE  
Minister Bilong Education



long klas rum. Ol papamama na pikinini i save kisim skul long olkain samting kibung, kos, redio, niuspepa na buk. Ol toktok bilong papamama tu i save skulim ol pikinini, olsem na skul i no save kamap insait long klasrum tasol. Nogat. Skul i save kamap long ausait tu wantaim.

Na narapela plen ol pepel bilong Is Nu Briten i gat em Non Fomel Edukesen. Em i min olsem ol papamama i save givim skul o lainim ol pikinini long olkain samting olsem wok didiman, wok bisnis na we bilong lukautim ol yet, bai sik i no ken kisim ol. Na tu ol i save skulim ol long Provinsel na Komuniti Gavman na Viles Kot.


Infomel Edukesen i no nupela skul, tasol Provinsel Gavman i laik bai ol i wokim long wanem, ol i laik strongim plen bilong ol pipel bilong Is Nu Briten. Na narapela plen em ol i laik strongim Fomel Edukesen bilong ol pikinini. Dispela Fomel Edukesen i min olsem, ol samting ol pikinini i lainim long klasrum taim ol i skul long prep skul, komuniti skul na haikul.

Plen bilong Fomel Edukesen i olsem, sapos ol i putim Standet 7 na Standet 8 long Komuniti Skul, bai i nogat moa dropaut manki long Standet 6 olsem nau. Husat sumatin i laik pinisim standet 8 na i laik go long haikul, vokesenel skul o go bek long ples, em inap sapos ol papamama bilong em i orait long em.

Provinsel Gavman ba i mas lukluk gut tru long ol nupela lo em Edukesen Dipatmen i givim long ol tisa long bihainim. Provinsel Gavman yet i holim pisis sampela pawa long lukautim ol prep skul. Tasol ol i no holim pawa long lukautim ol komuniti skul na haikul.

I gat 3-pela sios i save ranim ol skul wantaim Provinsel Gavman, em ol Yunaitet sios, Katolik Sios na SDA Misin. Tasol SDA Misin i no save wok wantaim Provinsel Gavman na tupela arapela Sios long lukautim ol skul.

Briten, Mista John Here- man i tok, dispela 5 yia plen bilong Edukesen, ol i bin statim long dispela yia yet. Na narapela em Non Fomel Edukesen, dispela ol i statim pinis. I gat planti manmeri na pikinini i wok long go long kos, wok bisnis, skul long pasin bilong Viles Kot na ol



narapela kain samting olsem. Na tu nau ol pikinini krismas bilong ol 5 yia i stat long go long ol prep skul.

Ol i putim pinis Standet 7 long ol komuniti skul, na tu ol i skruim pinis wanpela yia moa long ol vokesenel skul. Bipo husat ol sumatin i bin go long ol vokesenel skul i save skul inap long 2-pela yia olgeta. Tasol nau bai ol i skul inap long 3-pela yia olgeta, na tu i gat ol bikpela manmeri i skul long ol vokesenel skul.

Long ol vokesenel skul, ol i save lainim pasin bilong kukim kaikai, samapim klos, lainim we bilong lukautim skun, na ol narapela samting olsem.

Mista Hereman i tok, sampela samting i stap aninit long dispela ol plen ol i wok long traim i stap. Sapos ol dispela samting i wok orait, bai bihain long 2-pela yia bai olgeta wok long skul i ran gut tru. Na tu em i tok, dispela senis ol i wokim na putim prep skul na Standet 7 long ol komuniti, em ol i traim tasol na lukim sapos em i kamap orait.

Mista Hereman i tok tu olsem, sampela senis long ol dispela nupela plen, bai inap long helpim na senisim planti pikinini i skul longpela taim moa long haikul. Bai i nogat moa dropaut long haikul na komuniti skul olsem nau.

Ol papamama na tisa wantaim Gavman bai wok bung wantaim long redim ol pikinini long kisim gutpela laip long ples o long skul. Ol papamama tu i ken go kisim skul long ol vokesenel skul na lainim planti ol arapela gutpela samting.


Bai sampela samting i no kamap stret long dispela plen, em long kos bilong ol samting olsem pe bilong ol tisa, haus na ol

arapela samting olsem. Na tu bai i gat planti sumatin tru long ol skul, olsem na pe o mani bilong ol samting bai i go antap tru.

Tasol ol pipel i bilip olsem, dispela tupela hevi bai ol inap daunim long


hatwok na selp rilaiens. Sapos dispela ol tingting bilong Is Nu Briten long senisim Edukesen Sistem i ran gut, bai dispela gutpela pasin ol inap long soim long ol narapela provins long Papua Niugini.

### IS NU BRITEN EDUKESEN PLEN.





1979 — Yia bilong Pikinini — Yu lukautim gut pikinini bilong yu o nogat!



COCA-COLA AND COKE ARE REGISTERED TRADEMARKS WHICH IDENTIFY THE SAME PRODUCT OF THE COCA-COLA COMPANY

HRME 015 6365

## KOMISIN BILONG BOSIM OL ILEKSEN I TOK SAVE LONG OL PIPEL.

### POMIO OPEN ILEKTORET BY-ILEKSEN.

Gavman i orait long ol dispela toktok bilong Ilekseen long 19 de long mun Epril, 1979.

Ol Nominesen i op long 19 de long mun Epril, 1979.

Ol Nomineses i pas long 18 de long mun Me, 1979.

Ol banis o ples bilong vot i op long 30 de long mun June, 1979.

Ol banis o ples bilong vot i pas long 28 de long mun Julai, 1979.

Ol dispela toktok bilong Ilekseen i mas go bek long 6 de long mun Ogas, 1979.

Gavman i orait long ol dispela toktok bilong Ilekseen long 19 de long mun Epril, 1979. Ol Nominesen i op long 19 de long mun Epril, 1979. Ol Nominesen i pas long 18 de long mun Me, 1979. Ol banis o ples bilong vot i op long 30 de long mun Jun, 1979. Ol banis o ples bilong vot i pas long 28 de long mun Julai, 1979. Ol dispela toktok bilong Ilekseen i mas go bek long 6 de long mun Ogas, 1979.

Sapos yu husat i laik putim nem olsem Kendidet, orait yu mas bihainim ol dispela lo:

1. Yu mas raitim gut nem bilong yu long Nominesen Fom na givim long Opisa bilong Ilekseen long Pomio distrik Opis long 18 de long mun Me, 1979. Stat long moning i go inap long 12 kilok tasol.
2. Yu mas givim K100.00 o sek mani bilong beng stret wantaim Nominesen Fom long Opisa bilong Ilekseen. Opis bilong bosim Ilekseen bai i no inap long kisim ol narapela kain sek mani.
3. Ol Opisa bilong Ilekseen yet bai i kisim poto bilong yu, o sapos nogat, yu ken bringim poto bilong yu yet. Longpela bilong dispela poto i mas olsem 11 inses, na brait bilong em i 10 inses tasol (11"x10").

Ol Nominesen em ol Namba tu Opisa bilong Ilekseen i kisim long en:


1. Ol Kendidet husat i no inap long putim Nominesen bilong ol long Opis bilong Nambawan Opisa bilong Ilekseen, yu ken lusim Nominesen Fom bilong yu long ol Opis bilong Namba tu Opisa bilong Ilekseen long 11 de long mun Me, 1979. Stat long moning i go inap long 12 kilok tasol. Komisn bilong Ilekseen bai i no inap long kisim Nominesen bilong yu, em sapos yu bringim Nominesen Fom bilong yu long Opis bilong Namba tu Opisa bilong Ilekseen bihain long 12 kilok, long namba 11 de long mun Me, 1979.

Wanem ol pipel husat i laik resis long Pomio Open Ilektoret By-Ilekseen, yu mas givim Nominesen Fom bilong yu long Opisa bilong Ilekseen namel long moning i go inap 12 kilok tasol, long 18 de long mun Me, 1979. Sapos yu bringim Nominesen bilong yu bihain long 12 kilok, bai Komisn i no inap kisim dispela Nominesen bilong yu.

J.S. Mileng,  
Komisina bilong bosim ol ilekseen.

20 Epril, 1979.

# Baim strongpela bateri



# Baim maxell®



HAGEMEYER (PNG) PTY. LTD., PT. MORESBY, LAE, MT. HAGEN, WEWAK, MADANG, RABAUL.

GSMM37

# BEKIM OL MEMBA



## I GO LONG OLGETA MEMBA

Dia Wantok - Dispela toksave bilong mi i go long ol Mema bilong Nesenel Palamen. Yupela ol memba i no save tingim ol skul liva olsem ol Standet 6 na Fom 1 dropout.

Bilong wanem tru na yupela ol memba i no save tingim ol skul liva, ating ol dispela lain skul liva i bilong ol narapela kantri ah? Long dispela tasol, ol skul liva i ting, o sori mipela i nogat wok na wanem sam-

ting i kamap? Ol i stat long wokim raskal long ol taun.

Okei ol memba, yupela i mas tingim dispela samting, na tu traim long helpim ol skul liva. Sapos ol man na meri tupela wantaim i stap wok long taun, orait man i mas rausim meri i go long ples na larim ol skul liva i kisim ples na wok. Sapos dispela kain pasin i kamap, bai i gutpela tru long kantri bilong yumi.

Husat man o meri i laik bekim, orait bekim tasol i go long Wantok Niuspepa na yumi olgeta i ken lukim wantaim.

Kanema Bomal,  
Sina Sina/Simbu Province.

## LONG DELBA BIRI

Dia Wantok - Inap long yupela i larim mi long putim ol liklik wari bilong mi long Wantok Niuspepa. Wari bilong mi i go olsem:

Wanpela taim, mipela ol bikman bilong Viles Kot i bin bung long Kundiawa na holim wanpela miting

wantaim foma Minista bilong Jastis, Mista Delba Biri. Long dispela miting, mipela i toktok long pe bilong ol wokman bilong Viles Kot. Mipela i tok, bai ol i kisim pe long fotnait na tu bai ol i mas i gat yunifom bilong ol yet.

Long dispela miting, tupela man ya Delba Biri na Mark Konia i autim tok long maus tasol. Tasol nau mipela i no lukim wanpela liklik senis i kamap. Nogat na nogat tru.

Olanan, yutupela i mauswara tru ya. I luk olsem, yutupela i soim mipela olsem yutupela i bikman na i laik mauswara na giaman long mipela. Dispela i soim olsem yutupela i nogat gutpela tingting tru long helpim ol pipel bilong yutupela. Nogat tru.

Tingim gut, em i gutpela long yutupela i givim tok nating i go pas, na wok i kamap hihain. Em i nogut tru, olsem tasol i nogat senis i kamap liklik.

Olsem na sapos yutupela i tok promis, orait yutupe-la i mas tok promis stret.

Yutupela i mas redim ol samting yutupela i bin tok promis long en. Mipela i ting, em i no stretpela pasin longtok giaman long ol pipel. Em tasol long wari bilong mi, tenkyu.

K. Osbon Yombuglo,  
Kundiawa/Chimbu

## LONG MARK IPUA

Dia Wantok - Inap long yupela i putim liklik hap spes bilong mi, bai mi ken putim wari bilong ol pipel bilong Laiagam insait. Wari bilong mipela i go long Mema bilong mipela long Palamen, Mista Mark Ipuia.

Long maus bilong ol pipel, mi laik tok olsem: Mark Ipuia, yu memba tasol yu no save toktok long mipela na tokim mipela long wanem samting yupela i bin toktok long en long Palamen. Na tu yu no save i kam raun long-taim bilong singsing, long maket na ples, na harim wari bilong mipela. Mipela i save lukim yu raun wantaim ol yangpela meri, na poroman wantaim ol na

sindaun gris tasol na i stap. Yu oltaim i save raun wantaim ol yangpela boi na tanim het bilong ol tasol. Mipela yet i lukim dispela pasin, na mipela i ting em i no stret long mipela. Yu gat bikpela edukesen, tasol yu no save yusim tingting bilong yu liklik.

Mipela ol pipel i no save harim nem bilong yu liklik long sampela toktok yu mekim long Palamen. Na tu mipela i lukim olsem, yu no mekin gut tumas long mipela ol pipel bilong Lagaip na Pogena. Olsem na mipela ol pipel i laik tokim yu stret nau, Mark Ipuia, yu mas mekim wok bilong yu stret olsem Mema. Yu mas toktok wantaim mipela long ples, o long Laiagam, maket na ples bilong singsing na kisim ol wari bilong mipela ol pipel.

Em tasol wari bilong mipela ol pipel bilong Lagaip na Pogena.

Matakale L. Rapelyo,  
Lagaip, Laiagam/ Enga.

# Yumi Olgeta I Laik Smel Nais Na Smel Klin

Spray Fresh Em I Wanpela Kain Smelpaura I Save Tekewe Hariap Ol Smel Ngut Bilong Bodi. Na Em I Wok I Stap Longtaim Moa.

I Gat Tupela Kain Spray Fresh Na Tupela Wantaim I Bilong Olgeta Memba Bilong Famili.

Yu Go Baim Sampela Spray Fresh Long Tretstua O Long Bikpela Supamak  
Yu Ken Painim Long Wanpela Yelopela O Blupela Tin.


Olgeta Memba Bilong Famili Bilong Yu I Ken Yusim....Na Bai Ol I Smel Nais Na Klin.

Yu Go Baim Sampela Spray Fresh Long Tretstua O Long Bikpela Supamak Long Taun



# SKUL NATING NA NOGAT WOK

# LAIP



# LAIN

## Dia Laiplain,

Dispela em i las yia bilong mi long haiskul. Mi bin taitim bun tru long skul na mi laikim tumas long painim wok bihain mi pinisim skul. Tasol tisa i save tokim mipela olsem: sampela bilong mipela bai no inap painim wok. Na dispela i mekim mi bel kaskas tru. Bilong wanem mi mas taitim bun na brukim het long skul, sapos bihain mi no ken painim wok.....na mi mas go bek tasol na sindaun nating long ples? Inap yu ken tokim mi, mi mas mekim wanem samting bai mi ken painim wok bihain mi winim skul pinis?

## Dia Pren,

Ating oltaim yu bin ting olsem: yu go long skul long kisim wok long taun. Nau yu bin painimaut, i no gat wok, na yu bel kaskas. Tasol, pren, tisa bilong yu

*i bin tok tru. I no gat wok long olgeta studen i winim haiskul.*

*Sapos yu strong long kisim wok long taun, orait, nau yu mas taitim bun tru. Yu mas kisim gutpela mak tru.*

*Tasol mobeta yu sindaun tingting pastaim. Sapos yu no inap kisim wok long taun na winim mani, em i no min yu no inap mekim arapela kain wok. Nogat. Em i no min save bilong yu i lus nating. Nogat.*

*Mi wari long yu. Yu bin rait olsem: bai yu mas go bek long ples na sindaun nating. Bilong wanem sindaun nating? I gat planti gutpela samting yu inap mekim long viles na ples. Kantri bilong yumi i mas gat planti saveman i gat laik long go bek long ples na yusim gutpela save bilong ol bilong helpim ol wantok na wanlain long*

*kisim gutpela sindaun.*

*Papamama bilong yu i bin kisim save long papamama bilong ol. Long ples i gat planti save i no stap insait long ol buk. Na ol boi na meri i ranawe i go long taun, ol i tromoim ol dispela save bilong ol tumbuna. Sapos yu sindaun i stap long ples, yu inap kisim gut ol dispela save bilong bipo.*

*Sapos yu skul pinis na yu go bek sindaun na wok long ples, yu inap bringim olgeta gutpela save bilong yu i kam insait long ples. Na yu inap bringim planti nupela pasin na aidia i kam insait long ples. Yu ken kisim moa save tu long ol didiman na helt opisa na bisnis opisa.*

*Yupela manmeri i bin winim skul, yupela inap bringim planti nupela samting i kamap long ples. Bringim wara i kamap long ples. Groim ol nupela kai-*

*kai bilong salim long maket. Ranim ol tretstua. Skulim pipel long ol we bilong abrusim sik. Yes, i tru .....ol dispela wok bai i no putim sampela kina long poket bilong yu olgeta fotnait. Tasol yu mekim gutpela samting tru bilong helpim yu, na ol pipel bilong yu, na dispela kantri tu.*

*Olsem yu no bel hevi sapos yu no inap painim wok long raun. Yu no ken ting ol wok skul bilong yu i lus nating. Nogat.*

**SAMPELA BILONG YUPELA I NO NAP KISIM WOK Sapos YUPELA I NO KISIM GUTPELA MAK.....**



*Mi Laiplain.*



## GADEN LONG TAUN

REDIM BET BILONG PLANIM KAIKAI.

Sapos yu laik wokim bet o bokis i gat gutpela graun bilong planim kaikai, yu mas wokim antap liklik na i longwe long graun. Olsem bai graun i stap insait long bet o bokis i kamap gutpela tru.

Sapos yu stap long Moresby na yu laik kisim gutpela graun long putim insait long bet o bokis bilong planim kaikai. Em i gutpela sapos yu go long Brown Riva, na lukautim graun i stap arere long wara stret. Graun i blak tru na i gat ol sting lip diwai i gutpela tru bilong mekim ol kaikai na sayor i go gut tru.

Long taim yu laik wokim dispela bet o bokis bilong graun, pastaim yu mas makim ples bilong ples yu bin makim pinis long en wantaim matok bilong en wantaim matok bilong yu inap olsem 2 inses i go daun. Na bihain yu ken brukim nabaut ol hap graun i go liklik tru na putim olsem 2 inses wesana o ston insait long bet o bokis graun. Olsem tasol

bai wara i no inap long stap antap tasol, bai wara i ran isi tru i go ausait long bet o bokis graun.

Yu ken yusim hap timba nabaut na wokim arere bilong bet o bokis graun bilong yu. Sapos em i hat long yu painim timba kwik, yu ken yusim ol ston, o ol hap diwai nabaut na wokim arere bilong bet long en.

Long taim yu wokim bet o bokis graun pinis, yu ken putim graun wantaim ol sting samting olsem kaikai na pipia nabaut i go insait long bet. Bihain orait yu karamapim wantaim kunai gras, o ol lip bilong gras bilong solwara. Yu mas karamapim gut tru oltaim, olsem tasol bai san i no inap long bagarapim graun bilong yu. Na tu ol

gras nogut i no inap long gro antap long graun insait long bet. Na oltaim yu mas givim wara long bet o graun i stap insait long bokis.

Sapos em i hat tru long yu painim gutpela graun, na tu sapos yu save planim ol kaikai na sayor bilong yu long wesana, o long ol pipia na paura bilong timba. Yu mas oltaim baim fetalaisa o marasin bilong planim kaikai. Ol pipia na paura bilong timba i no hevi tumas, olsem na sapos yu gat ka o bikpela trak, yu ken go na kisim fri tasol long wokim gaden.

Tasol sapos yu laik wokim bet o bokis bilong graun long pipia na paura bilong timba. Pastaim yu

mas putim olsem 2 inses wesana na ol liklik ston na wokim arere bilong bet bilong yu. Yu ken yusim wanpela 44 galen dram em ol i katim long tupela hap pinis, o yu ken yusim ol plastik bek na sospen bilong planim kaikai. Tasol yu mas wokim ol liklik hul, olsem bai wara i ken ran i go autsait hariap.

- Planim Long Mun Me.**
- Long Nambis
- Minetto Lettuce
- Hybrid Dixie Jumbo Rock Melon
- Egg Tomato
- Dwarf Snake Beans
- Long Hailans
- Carrot Topweight
- Blackjack Hybrid Zucchini
- Candy Red Hawkesby Water Melon
- Pioneer Beans

## Yates

## Yates

# wokim strongpela gutpela seeds

## Kamapim planti gutpela kaikai

## Yates

P.O. BOX 147  
DARRA  
QUEENSLAND  
4076  
AUSTRALIA



**Air Niugini  
helpim go het  
bilong  
Kantri**



**FAST  
COMMUNICATION**

**AIR NIUGINI** 

**MISTA ... TOKSAVE LONG..**


# **BIKPELA KOMPAS BILONG KAMDA**

Ian Donald i raitim.



Dispela bikpela kompas bilong kamda i wokim haus, em i olsem wanpela hap diwai i gat wanpela ai namel long em. Na insait long dispela ai i gat wara i ken tokim wokman sapos samting i hangamap stret o i slip stret, olsem sapos man i mekim wok simen.

Lesen 5.



Lukaut: Sampela taim sapos yu paitim kompas, mak bilong wara bilong em i surik na em bai wok kranki. Sapos yu laik traim kompas i wok gut, orait, sanapim wanpela stretpela plang na mekim em i level tru. Nau tanim nabaut kompas na traim long narapela we o sait. Maski, yu holim kompas olsem wanem, em i mas wok stret. Sapos yu painim kompas bilong yu i kranki, mobeta yu go long kamdaman tru o teknikal skul, bai ol i ken stretim bek.

Man i gat dispela kain kompas, em i mas lukaut gut long em. Nogut em i paitim strong na ol mak bilong wara i surik o i lus na bai kompas i wok kranki, na wok bilong kamda i paul nabaut.

## **ples bilong baim Bigpela Kompas bilong Kamda**



**MACHINERY NA HARDWARE**

PORT MORESBY . GOROKA . LAE . KIETA . MADANG . POPONDETTA . RABAU  
KUNDIAWA . MT. HAGEN . SAMARAI . VANIMO

*Bigpela Kompas i stap long Steamships  
i gutpela na strongpela tru*

*Nem bilong dispela Kompas* **STANLEY**





## Watpo Nogat Wok.

Dia Edita - Nau em pes taim bilong mi long rait long Wantok Nius. Yupela inap givim mi liklik spes long mi putim wari bilong mi. Wari bilong mi i go olsem. Planti taim mi save i go insait long sampela kampani o long opis long askim long wok, tasol ol Tolai meri ol stap long taiping. Na mi save go askim taiping meri, we menesa? Na meri askim mi, yu laikim wanem? Na mi tok mi laik wok. Em save tok sori nogat wok.

Mi no ting em menesa. Tasol em leba nating na em save tok olsem. Na mi save sori bikos mi i no bin askim menesa.

Yupela taiping meri traim na soim menesa. Yupela save sem o nogat olsem em kampani bilong yupela stret. Mi olsem bai mi sem na mi inap soim menesa.

Em tasol liklik wari bilong mi, sapos yu husat belhat o kros samting bilong yu. Pinisim laik tasol. Tenk yu.

Bai Kuma Manuba, June Valley/Port Moresby.

## Asua Bilong Ripota.

Dia Edita - Mipela ol lain bilong J.O.B. Builders i amamas tru yupela raitim stori bilong mipela long Wantok, namba 254, 17 Februari, 1979.

Nau mipela i laik autim wari bilong mipela bikos sampela samting i no stret yupela i bin raitim. Tru, ol poroman bilong kampani em i sumatin bilong Sen Josep Teknikal skul na sampela wokman i kisim

save long wok tasol. Kampani i kisim nem Incorporated long yia 1976, na i bin kama olsem lokal kampani stret. Bilong statim kampani mipela yet i bungim mani mipela i save winim long wok nabaut.

Long dispela taim fot-nait bilong ol wok i liklik tasol. Ol win mani i go insait long kirapim kampani bilong mipela. Bruder Hubert i save stiaim mipela na givim aidia na tu bosim mani bilong mipela long dispela taim. Skul i no bin putim mani insait long dispela. Nogat tru.

Mipela i gat 12-pela sea-holda na nominal kapital bilong kampani i olsem K20,000.- Mining bilong em i olsem: kampani i gat 20000 sea long K1.00 tasol. Wan wan memba bilong kampani i ken baim sea long laik bilong em, sapos ol bosman bilong kampani i orait.

Kampani i gat 6-pela Direkta long stiaim ol wok. Pastaim mipela i gat liklik mani bilong baim ol material bilong wok. Misin i save helpim mipela sampela taim. Nau mipela i stap long lek bilong mipela na nogat dinau long misin, beng na arapela man. Ol wok mipela i winim pinis na ol wok i wetim mipela em inap long ranim kampani. Mipela i bin hatwok tru na long dispela hatwok kampani bilong mipela i bin kama.

John Jimmy,  
Lae.

## Maski Tambu Long Nait.

Dia Edita .. Mi laik bekim pas bilong Leo Tambu bilong W.H.P. Em i raitim pas na sapotim tok-tok bilong minista long tambu long man i no ken wokabaut long nait.

Long tingting bilong mi, mi ting olsem sapos tambu long ol man i no ken raun long nait, yumi ol man em yumi no save long stil na kilim man em bai yumi pret long ol plis. Na yumi slip long haus

tasol.

Ol raskol man na man bilong stil, ol bai i no inap long slip. Nogat tru. Ol bai wokabaut long nait, wantok Leo Tambu. Yu save sapos ol raskol man i laik brukim haus na sapos sampela man i go kama bai ol i ranawe.

Na sapos tambu long man i no ken raun long nait, em bai ol raskol i brukim haus moa yet. Yumi ol gutpela man bai yumi pret long plis na slip tasol ol raskol bai i no inap long pret long plis na slip.

Em olsem tingting bilong mi tasol. Yu husat PNG i laik bekim o sapotim pas bilong mi, rait tasol i go long Wantok Niuspepa bai mi lukim.

Paul Jambelata,  
Port Moresby.

## Klinim Lumi

Dia Edita - Plis inap long yu givim mi liklik hap spes long mi bai mi autim liklik wari bilong mi long ol wantok i ken lukim. Wari bilong mi i go olsem. Mi i no amamas long Lumi taun na tu mi i no hepi long ol bikman bilong Lumi Provisal Opis na yu husat i bosim Lumi taun.

Long wanem mi bin raun long Lumi na mi lukim i no stret long ai bilong mi. Lumi taun i pulap tru long gras. Klostu bai i kama bikbus olgeta. Olaboi, nogat man long wok, nogat mani long kisim ol wokboi, laka? Traim na klinim stesin bilong mipela. Bus i karamapim taun na i no gutpela long ol ausaitman i lukim. Ples balus tu i pulap tru long gras. Plis traim na klinim taun o stesin bilong mipela olgeta.

Em tasol liklik wari bilong mi. Sapos yu husat man i ting olsem wanem. Plis rait tasol i go long Wantok Niuspepa. Bai mi ken lukim.

D.A. Denkil,  
Lumi/Wes Sepik

## Autim Gutpela Nius

Dia Edita - Mi save harim sampela Redio Stesin i gut-

pela tasol dispela redio stesin long Not Solomons i narakain. Em olsem sampela pipel o sampela man i mekim samting insait long hait bai anaunsa bilong redio save anaunsim i go aut.

Na wanpela samting tu i no gutpela long kisim ripot nogut i go na anaunsim insait long redio. Na tu man husat i save kisim ol ripot i mas save no ken kisim sampela ripot bilong sem i go insait long redio na anaunsim long planti tausen man i harim na save sem long en.

Yu husat save kisim ol ripot yu mas tingting gut. No ken lusim skin bilong pren bilong yu i go long rabis dram, em i man olsem yu. Na tu yu mas kisim ol gutpela klinpela ripot i kam givim long anaunsa.

I tru redio stesin em wok bilong en long anaunsim na i go aut tasol, yu man husat i save kisim ol ripot insait long haus kot o maket ples yu no ken kisim ripot nogut bilong sem i go putim long redio stesin.

Em tasol belhevi bilong mi long dispela. Husat pren o brata i laik bekim dispela i mas putim i go long Wantok.

Ahesong Pipange,  
Panguna/Not Solomons

## Laik Bilong Wan Wan

Dia Edita - Yes ol wantok na bratasusa. Mi laik bekim pas bilong brata ya Samson Lapet, yu tok yu bilong Hailans. Yu i stap long Panguna long Not Solomons Provis. Brata, yu tok long ol pasindia, yu mas tingim gut pastaim. Na yu rait i go long Wantok Niuspepa.

Nogut yu lusim dispela rabis het bilong yu. Yu givim mani long ol man i raun nating. Nogat wok long

taun. Na yu givim kaikai long ol na yu tok long ol pasindia

Sapos yutupela i go long stua na yu save givim mani long em na em i baim botol dring o kaikai long stua. Tingim gut na yu raitim pas i go long Wantok Niuspepa na ol man bilong dispela kantri i ken baim na ritim gutpela tok-tok bilong yu.

Nogut yu raitim dispela longlong toktok bilong yu. Yumi kristen kantri na tu yumi independen kantri. I no gat tambu long yu husat man i ken i go raun long narapela provins.

Em tasol wari bilong mi. Mi bekim pas bilong brata Samson Lapet. Husat i laik bekim pas bilong mi, orait, rait tasol i go long Wantok Niuspepa.

Gallus Managet,  
Maprik/Is Sepik

## Bekim Long Yakuman

Dia Edita - Plis mi laik yu putim dispela liklik bekim bilong pas hia long Wantok Niuspepa. Na dispela bekim bilong pas i go long Yakuman Yales na ol lain wanpesis olsem.

Ating yupela olgeta i bin wokim wanpela Pinat Bata Faktori bilong PNG long Enga, olsem na yu bin tok baksait long Makam Pinat Bata. Na mi ting yu wanpela mauswara man olsem, yu laikim helpim Pinat Bata bilong narapela kantri na olsem yu tok egensim Makam Pinat Bata insait long PNG.

Na mi ting yu mas no ken baim Makam Pinat Bata long kaikai. Na mi ting olsem tingting bilong yu i mas ting olsem yumi. PNG i no ken wokim Pinat Bata Faktori long hia

Yumi mas laikim arapela kantri long wokim Pinat Bata faktori tasol.

Alfred Irints,  
Finschhafen/Morobe

# BAIM WANTOK

Sapos yu laik kisim Wantok niuspepa olgeta wik inap long wan yia stret, yu salim nem na adres bilong yu wantaim K8.00 i kam long:

**WANTOK BOX 1982 BOROKO**

Long go long Australia em i K14.00.

Long Yurop na Amerika: K 18.20 (long sip)

K 24.00 (long balus)

# LAPUN MERI BUNGIM PISIN KOKI



## HAP NAMBA WAN

Dispela i longpela stori olsem na bai kamap long Wantok Niuspepa tripela taim. Dispela i hap namba wan.

Long bipo tru wanpela yangpela man em i kisim banara na spia bilong em na em i go long bus. Taim em i go kamap long wanpela diwai i gat planti kai-kai bilong em. Man, ol pisin i no pilai pilai long dispela diwai. Ol i pulap nogut tru. Ol traipela trai-

pela pisin. Ol i kolim Koki, na dispela man i lukim olsem na em i wokim haus antap long dispela diwai. Na em i go insait long haus na i was i stap.

Taim em i sindaun na was i stap. Na planti pisin

moa i kam long kaikai pikinini bilong dispela diwai. Taim man ya i sutim ol pisin na pisin i karim spia i go pundaun antap long Limbum. Em i wok long sutim ol dispela koki. Na em i no pundaun i go daun stret long graun. Nogat. Olgeta i go hangamap long dispela Limbum.

Em i wok long mekim olsem i go i go na taim i pinis. Olsem na em i lusim i go long ples. Em i go slip i stap. Na long moningtaim, samting olsem 6 klok. Em

i kirap na karim banara bilong em na i go pinis long was gen long dispela diwai em i bin wokim haus long en.

Man ya i go was i stap na ol koki i kam pulap i stap. Na dispela man i sutim ol pisin i no go daun long graun. Nogat. Ol i hangamap gen long dispela Limbum. Em i mekim olsem i go i go na em i belhat nogut tru. Na em i sutim wanpela koki gen na em i go hangamapim gel long dispela Limbum.

Nau em i go daun long graun. Na i lusim ol banara bilong em i stap long graun na em i wokim rop na em i goap long dispela Limbum. Taim em i goap i go antap long Limbum na dispela Limbum i wok long i go longpela tru i go antap. Na dispela Limbum i karim dispela man i go antap long mun.

Dispela Limbum i go insait na i lusim dispela man i stap antap na em i kamdaun sot gen. Dispela Limbum i kam sotpela tru long graun. Na tarangu man ya i stap antap yet. Man, tarangu i pret nogut tru. Na em i hait i stap long arere long ples i stap. Na wanpela lapun meri i kisim pipia i kam tromoi arere long dispela man i hait long en.

Nau dispela lapun meri i kisim dispela man na i bringim em i go long haus bilong em. Nau lapun meri i tokim man ya. Olgeta koki yu bin sutim em mi kamautim ol gras bilong ol na bungim i stap. Na ol kaikai bilong ol mi smokim na putim antap i stap long bet.



Na dispela lapun meri wantaim dispela man ya, tupela i sindaun i stap. Dispela man ya i lukim traipela paia i lait i stap. Lapun meri i bosim i stap. Man ya i bin go antap i lukim dispela paia na em i pret wantaim na i stap.

Tasol meri i tokim em yu no ken pret. Yu mas kam boinim skin long paia. Orait dispela man i kam sindaun long paia na boinim skin. Na lapun meri i go long gaden na i kisim kaikai na kam kukim na em wantaim dispela man i kai-kai. Na lapun meri i tokim man ya olsem. Long nait bai ol manmeri i kamap na singsing. Na tupela i stap.

Tupela i stap i go long apinun na i go inap long nait. Man, i no pilai pilai manmeri i kamap na singsing. Dispela man i askim dispela lapun meri ya olsem: "Ei, tumbuna planti manmeri i stap we na ol i kam singsing?" Dispela man i go het yet na i askim. Taim mi kam na mi no lukim planti man. Na i no gat haus bilong ol ya. Ol i stap olsem wanem na ol i kam singsing?"

Neks wik bai hap namba tu.

## TAMBU TORO



# Sande Lotu

Frank Mihalic i raitim

SANDE NAMBA 6 BILONG ISTA.  
20 Me, 1979 – (Jon 15: 9 – 17).

Rit bilong Gutnius bilong dispela Sande i stori long taim Jisas i sindaun kaikai wantaim ol disaipel bilong em. Em i givim sampela las tok long ol. Em i laik go nau. Long tumora bai ol birua i kilim em. Em bai lusim laip bilong em.

Insait long dispela tok bilong em i gat planti skul. Wanpela dispela i go olsem: "Sapos wanpela man i lusim laip bilong em yet bilong helpim ol pren bilong em, i no gat pasin bilong laikim arapela man i winim dispela pasin."


Dispela lo bilong givim laip bilong helpim narapela man, em i bin kamap strong moa long ol lain pipel i Kristen long-pela taim. Long Yurop na Amerika na Australia planti taim yumi save ritim stori long man i kalap i go daun long wara bilong sevim wanpela tarangu i pundaun long wara na i laik dai. O yumi ritim stori bilong man i ran i go insait long haus i paia bilong helpim man o meri i kalabus i stap insait. Man o meri ya i redi long givim laip bilong ol bilong bilong sevim narapela man o meri.

Na hia long PNG yumi gat wanpela gutpela eksampel bilong dispela kain pasin na tingting. Long taim bilong woa wanpela man bilong bus bilong Wewak, nem bilong em Yawiga, em i helpim ol Australia long pait. Em i hait insait long wanpela hul wantaim sampela soldia. Orait, ol Japan i tromoim wanpela hanbom i go long dispela hul. Yawiga i lukim na i no laik bai ol poroman i dai, olsem na em yet i kalap i pundaun antap long bom na em i pairap. Yawiga i sevim laip bilong ol arapela soldia, tasol em yet i lusim tupela ai bilong em, na raithan bilong em i tekewe olgeta. Yawiga i stap yet.....na em i gat wanpela blupela ai. Wanpela Australia i tenkyu long Yawiga na i givim wanpela ai bilong em yet long Yawiga.

Tasol i no gat planti manmeri bilong PNG i gat dispela kain tingting bilong Yawiga. Long wanem, dispela tingting i samting Kristen tru; na i no samting yu inap lainim kwiktai. Nogat.


Dispela lo bilong givim laip bilong soim laik bilong yu, em yumi ken lukim olgeta de. Em i no min laip bilong yu i mas lus. Yu givim laip bilong yu sapos yu oltaim mekim mekim, yu wok wok yu no ting long pe. Yu ting long gutpela papa na mama. Ol i wok wok na ol i no singaut long pe. Yu ting long ol gutpela tisa i wok planti aua moa. Yu ting long katekis i no wok long pe. Yu ting long ol misineri i wok i wok na i no kisim pe. Yu ting long ol longpela aua bilong plisman na soldia na dokta na nes.....

Man o meri i helpim yu tru – man o meri i helpim kantri tru – em i no wok mani. Em i no wari long aua na pe long fotnait. Em i givim laip – em i min, taim na save na wok na strong bilong em – bilong helpim narapela man. Olsem Jisas i tok: I no gat wanpela man inap long em.



## Devit I Ranawe

1 Samyuel 19:11-22



Used by permission of the David C. Cook Foundation. Copyright 1973, David C. Cook Publishing Co. All rights reserved.

Komik hia i kamap pinis long buk. Yu inap balm long olgeta Kristen Buk Stua.

# Tarzan

by EDGAR RICE BURROUGHS



Kepten, Tarsan na lain man ya ol i stap yet insait long hul bilong maunten.

Mugambi...Ol i mas hariap i kam ausait bek.....Ol klaut nogut i kirap nau na ol i boil i kam antap... long ol maunten ya..... Yumi mas ranawe kwiktait...nogut balun balus i go insait long ol dispela klaut i boil...Sapos ol i no hariap....yumi mas lusim ol i stap...na yumi mas flai i go.....



Kros? Watpo mi kros na bel kaskas??? Olaboi, Tarsan, yu tu yu kros sapos ol stilim o kilim indai gelpren bilong yu, Jen.



Meri bilong mi Laja....ol Sagot i stilim na kilim.....

Mi bin pait wantaim ol olsem wanpela longlong man....na ol i bin sutim mi... na mi pundaun i dai...na bihain ai bilong mi op gen...na husat i slip i stap arere long mi? Em meri bilong mi tasol, em Laja....ol man i kilim em indai pinis.



Nau yu tok Pellucidar bai bagarap?

Gutpela tru...Maski larim skai i pundaun antap long em. Mi les long olgeta samting nau.....Mi no inap belgut moa, meri bilong mi i dai pinis .....

© 1978 United Feature Syndicate, Inc.



Von Horst, kwinn Dian bilong Sari i singaut long yu kam helpim em. Biktaun Sari i bagarap olgeta na king Innes i lus pinis.....

Maski long dispela Innes...Laja bilong mi i no moa stap...na yumi no inap painim em moa. Em i dai pinis...



Von Horst, yu harim nau. Tok save i kam long David Innes i bin tok long tripela samting: gurina na Mahar na ol Sagot....

Ol Sagot???

EEEE!



Guria.....

# SPOT PES





*Sempian Boksa bi-  
long Papua Niugini,  
Mista John Aba i  
winim namba tu pait  
bilong em. Nau em i  
redi long traim Wol  
Taitel Pait wantaim  
Wol Sempian, Pedroza  
long Moresby long 29  
Jun.*

*Aba i paitim nogut  
tru Gary Rosen bilong  
Fiji na i autim em long  
namba siks (6) raun  
long Panguna, long 21  
Epril.*

Poto — Bougainville News

# ABA Pinisim Rosen



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.